

Date – 19/04/2025

Time - 7:30 -7:40Hrs

REGIONAL NEWS BULLETIN

HEADLINES (MORNING)

- 1. North Tripura district thuneitute chuan Thaidawr panna kawng an laih chu an titawp nghal.**
- 2. Food, civil supplies & consumer affairs department chuan mipui buhfai ei tur phur a kawng laka hralh rutute lakah FIR an thehlut.**
- 3. India-in vansang zirna lama bung thar kai turin thlaleh hian International Space Mission-a Indian Astronaut a tel ve dawn.**
- 4. Union Minister of State for Information and Broadcasting L.Murugan hoin World Audio Visual Entertainment Summit (WAVES) 2025 inbuatsaihna thlirho a ni..**

<><><>

BORDER ROW

Home minister Pu K. Sapdanga chuan Mamit bawrhsap-in a hriattir hnu-ah North Tripura district thuneitute chuan Phuldungsei ram Thaidawr a kawng an laih chu an tihtawp nghal thu a sawi.

Pu K. Sapdanga'n Akashvani Aizawl a hrilh danin sorkarin ti tura a hrilh angin Mamit bawrhsap Pu K. Laltlawmlova chuan North Tripura bawrhsap Pi Chandni Chandran chu Nilaini tlai khan be nghalin Thaidawr a kawng an rawn siam chu chawlhsan turin a hrilh a, an hna pawh an chawlhsan nghal a ni. Home minister chuan he lai a ram inchuh chungchangah hian Mamit leh North Tripura bawrhsapte chu inbe tura ruahmanna siam a nih thu a sawi a. A tul dan a zirin state sorkar thuneitute inbiakna tur pawh ruahman theih a nih tur thu a sawi bawk.

Puan tawh angin Tripura sorkarin Thaidawr-ah kawng an siam tih hriat a nih ve leh Mizoram sorkar chuan Forest Minister Pu Lalthansanga chu a hmunah a tir nghal a. Minister hian Phuldungsei khawtlang hruaitute nena an inkawmna-ah he lai hi sorkarin a ngaihthah rei avangin Tripura lam hian kawng an rawn siam ni a sawiin tun atang chuan sorkarin ngaihsak chhoh zel a tum thu a sawi a ni.

MZP hruaitute pawhin Tripura sorkarin Thaidawr tlang panna tur kawng a laih hi tlawhin tihtawp vat a nih theih na'n Mizoram sorkar chu hma la turin an ngen a a ni.

<><><>

REFEGEE RESTRICTIONS

Lunglei district thuneitute chuan an district huam chhunga raltlante chu relief camp atanga an luh leh chhuah an khuahkhirh dawn.

Ningani khan Lunglei SP Pu Jerome Lalmuankima'n Th̄aizawl relief camp-ah he thu hi sawiin, raltlan camp-ah duty te dah an nih tur thu leh duty-te leh raltlan camp leader te remtihna lo chuan camp atanga duh ang anga luh leh chhuah hi khuahkhirh a ni ang a ti a. Lunglei district SP ho hian Th̄aizawl relief camp-ah Awareness Campaign for Myanmar Refugee buatsaih a ni a. He hunah hian Pu J. Lalmuankima leh staff te bakah Sub-Hqrs YMA, MZP Hqrs Lunglei leh MSU Regional Hqrs Lunglei te'n hun an hmang a ni. SP chuan raltlante chu Mizoram hmun hrang hrang a buaipui mek leh th̄alai tam tak suattu ruihhlo tawlhurutu ni lo tur leh a tilui an awm a nih chuan dan anga hrem an nih tur thu a sawi a. License nei lo va lirthei khalh lo tur leh an khalh lui a nih chuan dan anga hmalak a nih tur thu sawiin, Kenbo 125 bik-te te chu mahni awmna camp theuhah khawtlang hruaitute leh Police te nen tangkawpin, hmun khatah khalhchhuah theihlohva dahkhawm turin hmalak a ni ang a ti bawk.

Sub-Hqrs YMA Lunglei Treasurer Pu K. Lalhruaitluanga pawhin, YMA kalphung leh hmalakna te a tarlang a, an chenpuite tana hnawksak lova awm turin a chah a, YMA Dan Bu leh Chhiatni Th̄atni Inkaihhraina Bu a hlan nghal a ni. Lunglei MZP Hqrs President Pu Johan Hmangaihzuala Ralte pawhin camp chhunga zirlai awm zatte leh an harsatna te MZP hnena thlen turin a ngen a, MZP chuan a theihna chinah a buaipui zel tur thu a sawi a. Tunhnaia raltlante pawikhawih an awm th̄in chu pawih a tih thu sawiin; Lunglei District chhunga raltlante chu hetiang kawnga inhnamhnawih ve lo turin a ngen a ni. MSU Regional Hqrs Lunglei Secretary Pu C. Lalthlamuansanga pawhin raltlan naupangte chu zirna ngai pawimawh tur leh nu leh pa pawhin an theihna kawngah an fate zirna lama an hmasawn theihna tura hma la turin a ngen a ni. Th̄aizawl Refugee Camp-ah hian tun dinhmunah chhungkua 167 awmin, mi 746 an cheng mek a. Zirna in hi Primary atanga Higher Secondary thleng a awm a ni.

<><><>

FIR

Food, civil supplies & consumer affairs department chuan mipui buhfai ei tur phur a kawng laka hralh rutute lakah FIR an thehlut.

Ningani a sorkar thuchhuahin a tarlan danin Mizoram sorkar chuan mipuite hnena buhfai tha, hnianghnar leh buk dik taka pe turin tha thlah lovin theihtawp a chhuah a. Hetih lai mek hian Food Civil Supplies & Consumer Affairs Department in buhfai a lak khawm leh Supply Centre hrang hranga mipui ei tur a sem chhuah tur phurtute'n kawng lakah an hralh thin a ni tih finfiah a ni a. Buhfai hralh thentu lakah First Information Report (FIR) theh luh tawh a ni. Hetiang thil thleng hi FCS&CA Department chuan a ngai thutak hle a, buk dik taka mipui te hnena buhfai pek chhuah kawngah harsatna a thlenin mipui chanvo dik lo taka lak sakna a ni, department hotute chuan an ti a.

Thil dik lo titute dan anga hrem turin Sorkar chuan hma a la zel dawn a, thil diklo titu te do let turin tanrual puiah mipui te a bawk tih thuchhuah chuan a sawi a ni.

<><><>

CADC BUDGET

Chakma autonomous district council (CADC)-a CEM chuan kumin tangka kum atana an council sum ruahman (budget) a pharh a.

CADC tana 2025-2026 tangka kum sum hman tur ruahman cheng vaibelchhe 230 leh nuai 12 chuang chu CEM Pu Molin Kumar Chakma chuan a pharh a. Cheng vaibelchhe 220 leh nuai 67 chu sorkar tanpuina (grant-in-aid) atanga hmuh tur, hnathawk hlauh atana hman tura ruahman a ni a. Chhiah atanga hmuh tur cheng vaibelchhe 1 leh nuai 45 hisap a ni bawk. Council hnathawk hlauh tur ni lo, hnathawhna atana hman tura ruahman hi cheng vaibelchhe 1 leh nuai 45 chuang a ni. VC lawmman (hlauh) atan cheng nuai 67, sing 3 leh sang 6 hmu tura ruahman niin hmasawna thawh na'n cheng nuai 77, sing 9 leh sang 8 ruahman a ni bawk a ni.

CADC inkhawmah hian tun hnai a boral EM Pu Sanjeev Chakma sunna hun hman a ni a. CEM-in sunna thu sawiin amah zahna lantir na'n ngawi rengin an ding bawk a ni. CADC budget pharh tak hi Thawhtanni-ah sawiho a ni ang.

<><><>

ASI

Archaeological Survey of India (ASI) chuan kumin February ni 25 atanga March ni 1 inkar chhunga Mizoram khaw hrang hranga pipute sulhnu zawna-village to village survey an kalpuina-ah pipute sulhnu lung ker enegmawzat an hmu chhuak.

ASI-in survey an beihna hmun hi Khawzawl, Saitual, Serchhip leh Champhai district-ah te a ni a. Heng district a khaw hrang hrang Tualte, Chawngtlai, Lianpui, Khuangleng, Chhawrtui, Rullam, Maite, leh Ruallung khua-ah te lung ker leh lungkerna hmun hi hmuhchhuah a ni. Lungker hmuhchhuah ah hian mihring lem te, Sial lu lem te, Sangha lemte ker a ni a, Assistant Superintendent Archaeologist Salam Shyam Singh, K. Lalrinchhani Assistant Archaeologist leh an team-te chuan he lung ker hmuhchhuah hi Mizo te tan thil hlu tak a ni a, Mizo hnam rohlu Mizoten Mizoram an luahna ti nghet tu a ni an ti.

Salam Shyam Singh chuan Tualte leh Chhawrtui a lung ker an hmuhchhuah techu mi dang pawna an la hmuh ngai loh thil thar tak a ni ati a, heng hmun nilo hmun dang a lung ker hmuhchhuah techu social media- a thlalak an hmuh hnua an zawn chhuah niin a sawi. He lung ker leh lung kerna hmun hi humhalh dan tur ruahmanna ASI lam chuan a la siam dawn a ni a ti bawk.

<><><>

RABIES VACCINATION

Thenawm Manipur state-a Churachandpur district-ah ui-a hri nasa taka a len avangin Mizoram district hrang hranga hrileng hi a lo luh ve lohna turin tanlak a ni.

Aizawl district leh Saitual district chu Churachandpur nena ramri intawm an nih avangin district thuneitute hmalakna a langsar zual a. Aizawl leh Saitual district, a bikin Manipur ramri hnaihah ui-a hri venna lak hna kalpui chhoh mek zel a ni a. Aizawl khawpui a Vety polyclinic-ah pawh ui za tel tak meuhvin ui-a hri danna hi an la tawh a. Chutih rualin khawpui chhunga veng hrang hrangah vety department hnathawkte'n kal chilhin ui-a hri danna an pe bawk a ni. Aizawl leh Saitual district bakah district dang bawrhsapte chuan ui-a hri leng chungchangah hian thupek chhuahin ui leh uisa lakluh khap a ni a. Ui neite'n ui-a hri danna laktir vek tura hriattirin, pawna ui chhuah khap a ni bawk.

Nimin piaah khan Aizawl bawrhsap pisa-ah bawrhsap Pu Lalhriatpuia kaihhruaiin thenawm state Manipur atanga ui leh a sa lakluh khapna thupek lo tihchhuah tawh chungchangah an thukhawm a. Aizawl District huam chhung a Local Council leh Village Council te kaltlang a ui â hri danna la leh la lo awm dan dinhmun lakkhawm leh hri danna la la lo te hnen a pek dan tur ruahmanna siam a ni. He thutkhawmah hian April thla atanga Sawrkar atang leh private clinic atanga ui-a hri danna pekchhuah dan report ngaihthlak a ni a. Ui-a hri awm dan leh a thawh dan te, a in kaichhawn dan te ngaihthlak a ni a. Tun dinhmun ah Aizawl District ah ui â natna kai finfiah a awmluh thu hriat a ni bawk. Inkhawmah hian, hun lo kal zel tur ah Aizawl district a mihring leh rante, he hri laka an him theih na'n hmalak dan tur rel a ni a. Manipur ramri check gate ah Police leh AH&Vety Dept. mithiamten endikna kalpui ni se an ti a. May thla chhunga ui-a hri danna a tam thei ang ber pe tura hmalak dan tur sawi ho a ni a. Mipui hnen ah he hri awm dan leh inven kawng a hriattur pawimawh inzirtirna uar zawk a kalpui ni se an ti bawk. He hunah hian Aizawl SP, AH&Vety, AMC leh CYMA, Aizawl City Local Council leh VC Association an tel a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

INDIAN IN ISS

India-in vansang zirna lama bung thar kai turin thlaleh hian International Space Mission-a Indian Astronaut a tel ve dawn. Union Minister of State for Space and Atomic Energy Dr.Jitendra Singh-a chuan nimina Indian Space Research Organisation (ISRO) meeting ah a sawi a. Indian Air Force Group Captain Shubhanshu Shukla chu Axiom Space Mission,Ax-4 ah a tel ve dawn tih sawiin India mi zinga International Space Station tlawh hmasa ber a ni ang a ti a. Kum 1984-a Soviet Soyuz Spacecraft-a zin ve Rakesh Sharma hnuah kum 40 hnua India mi vansanga zin leh hmasa ber a ni dawn tih a sawi bawk a ni.

<><><>

WAVES

Union Minister of State for Information and Broadcasting L.Murugan hoin World Audio Visual Entertainment Summit (WAVES) 2025 inbuatsaihna thlirho a ni. Mumbai-a Jio Convention Centre-ah inhmukkhawm hi neih niin he hunah hian sawrkar laipui leh Maharastra sawrkar atangin WAVES inbuatsaihnaa mawhphurtute an tel kim hle a. An inbuatsaih dan hrang hrangte tarlan a ni.

WAVES hi May ni 1 atanga ni 4 chhugnin Mumbai ah neih a ni dawn a. Media leh entertainment lama India-in hmahruaina kawnga thil pawimawh tak tak Television, Radio, Films, Gaming, AI, AR, VR leh XR pholan a ni ang.

<><><>